

雲南府志卷之二十

藝文志四

文

漢

移金馬碧雞文

諫議大夫 王 褒

持節使王褒謹拜南崖敬移金精神馬縹碧之雞  
處南之荒深溪回谷非土之鄉歸來歸來漢德無  
疆廣乎唐虞澤配三皇黃龍見兮白虎仁歸來歸  
來可以為倫歸兮翔兮何事南荒也

雲南府志

卷之二十

藝文四

明

弔國使王翰林文

布政 張 紘

訪前脩之遺烈兮在西南之天涯路漫漫其脩阻  
兮魂杳杳其曷追羅蕙肴與桂醕兮集眾美以為  
儀藉芳馨以比德兮庶英爽之在茲公之真潔世  
所信兮琢白璧為肺腑濯江漢而暴秋陽兮肯自  
浣乎塵土製雲霧以為錦兮又重之以黻黼攬星  
辰以耀芒兮宇宙軒豁其在手顧實焉而弗避兮  
斯大義之所存載使節以馳騁兮往振策乎南雲



嗟期運之未至今兮遇豺狼之狺狺彼徒知爪牙之  
可以逞惡兮又安知天命之維新人固有一死兮  
死固各以其仁惜芝蘭之見摧兮終腐朽於荆榛  
委蟬蛄而不顧兮挾浮雲而上征駕雲車以飄忽  
兮引彼煥赫之霓旌逐風廉而東驚兮歷倒影以  
憑陵過蒼悟之曠漭兮謁重華而是止愛傳說之  
有託兮亦徘徊於箕尾望故鄉而掩涕兮予豈能  
獨昵夫山鬼吁嗟歸來兮公不可以久留悵猿吟  
與鶴飛兮兩浩蕩而難儔將速返於故居兮寧爾  
雲南府志

卷之二十

藝文四

二

秋

宅之深幽有子有孫善繼而善述兮長致享於春

祭海口神文

巡撫

顧應祥

吳興人

維滇有池西南巨澤灌溉羣生一方利益諸水所  
歸廣大莫測末流如綫難通易塞加以霖雨洪波  
泛溢三四年間隴畝盡沒極望瀰漫蛇龍所窟顛  
天無從民艱粒食僉曰舊典匪濬弗克謀及士人  
謀及彝彙各獻其能限以丈尺萬夫荷鍤諸司効  
職疏厥淤沙還其故跡復開子河以防衝突自冬



徂春厥工始畢逝波滔滔海田漸出是皆神相匪  
我人力日吉時良潔此醴特敬報於神神其來格  
尚其默佑永保無窒

本朝

禱雨文

總督 范承勳

嘗聞祀典之設原不濫及非神必有功德於民  
或能禦災而捍患方使之享祀千載血食一方  
惟神具飛騰變化之靈蘊溥博淵泉之德每施  
膏澤養育生民故奉以崇祀隆其廟貌今滇省

雲南府志

卷之二十

藝文四

三

雨澤未遍某特親詣神祠齋宿致禱數日以來  
雖雲日時陰而滂沱未降再致祝祠伏冀大其  
顯應立沛甘霖倘或仍無感通是神之無靈不  
足以血食此一方矣某將毀其祠撤其祀轉而  
他求若荷惠此蒸民澤其枯槁某鳩工庀材擴  
其廟宇牲牲肥膾享其祭祀以報神德也敢告

禱雨文

巡撫 王繼文

自春徂夏雨澤愆期土田龜坼禾苗枯槁父老  
疾苦難堪官吏焦勞彌切前曾設壇祈禱悔過



省尤請邀俯鑒賜沛甘霖乃動經旬日雖有雲雷之作未蒙霑霑之施以致懸耒興嗟石田致嘆國賦民生兩有待命於神之明賜者日加急矣在神聰明正直大體天育物之功自不禁此十雨五風普令第豐種茂總由某等服官多愆精誠無由上通是以有感無徵降康莫必耳嗟此遺子遭兵燹頻仍之後卽時和歲稔大有屢書亦止僅免饑寒不能振復元氣若再加以旱魃爲災三時失望未有不婦子流離輾轉溝壑

者神爲民主諒所惻然動念倍切某等萬萬者矣今也省躬潔已再告赤忱伏望明神俯念官思補過民本無辜雲油油而雨憲憲立賜救此一方俾原田繡錯華黍興歌上濟軍國之需下有蓋藏之樂則叨沐神庥與天罔極矣

禱雨文

王繼文

自改壇步禱以來歷數日矣某等內致其誠外盡其敬夙夜恐懼省察爲滇父老請命於明神座右者不敢一息苟安乃杲日如初靈雨未降



畚鍤無時土垠泉竭覩勻勻之禹甸全無黃茂  
之觀難免困匱之患農愁於野婦嘆於室行旅  
不欲出其途商賈無所利其市勢愈迫矣情愈  
切矣仰望甘霖之沛不能斯須緩矣某等再禱  
而再不應者罪之大實自知之也或律已未嚴  
乎或措施多過乎或催科太急乎或刑罰失中  
乎未早之前有以召之使來當早之際復欲禱  
之使去宜乎神弗福也雖然官實有罪民本無  
尤官有罪官其受譴何忍使沾體塗足之窮黎  
雲南府志

卷之二十

藝文四

五

天子保赤之仁自神而遂矣惶恐叩首竭盡鄙誠謹再  
告

禱雨文

總督王繼文

火雲正麗甘澍難期計歲驚心撫時愒慮敬抒  
一念之誠虔請萬民之命仰賴神庥調元贊化



先施霖霖以潤土膏後益靈電而蘓嘉植活我  
蒸黎寧彼婦子行見荼朽苗新之樂悉出天高  
地厚之恩潔備沚毛用陳謝悃伏願雨暘時若  
水旱無聞俾主伯亞旅之儔觀順成而擊壤歌  
呼忘帝力於何有者莫不歸神聽之和平矣謹  
告

論

宋

高駢破南詔論

范祖禹

雲南府志

卷之二十

藝文四

六

蠻彝自古迭爲中國患繇秦以來未有得志於南  
蠻者也蓋以瘴毒險阻不得天時地利所恃者人  
和而已而民從征役皆知必死如往棄世則是三  
者皆忘矣秦發閩左戍五嶺而陳項起秦遂以亡  
漢初呂后欲誅趙佗士卒不能踰嶺武帝擊越發  
兵江淮因巴蜀罪人等放棄之蓋不可以中國之  
師涉其地也遂滅南越以爲九郡元帝卒罷珠崖  
光武遣馬援擊交阯最爲有功然三年而後克士  
卒死者什五六乃得一女子之首其難也如是唐



太宗欲討馮盎而用魏徵之策卒招懷之明皇之  
末李宓敗於雲南死者二十萬自是以後南詔盛  
疆至於懿宗陷安南圍成都中國首尾疲於奔命  
其後龐勳之亂起於桂林之戍黃巢之寇本於徐  
方之餘唐室之衰宦者蠹其內南詔擾其外財竭  
民困海內大亂而因以亡矣夫彝非能亡中國也  
而中國之亡蠻彝常爲之資是以聖王不重外而  
輕內不勤遠而忘邇恐征伐不息變生於內而搖  
其本也易曰高宗伐鬼方三年克之高宗賢王鬼  
雲南府志

卷之二十

藝文四

七

方小彝也以賢王伐小彝三年乃克言用兵之難  
也唐自開元至於咸通南部之師皆由邊臣貪利  
邀功以啓羣蠻自我致寇大爲國患非高宗不得  
已之伐也十年而克亦速矣哉

傳

明

石淙楊文襄公傳

尚書

雷躍龍

新興人

公諱一清字應寧號邃菴其先世爲滇之安寧人  
父景以化州同知致仕攜居巴陵少穎敏能屬文



有司以奇童薦爲翰林秀才憲廟俾內閣擇師教之與李文正東陽前後登庶子黎淳門年十五登北闈鄉試卽以經術爲人師十九成進士明年父喪解官卜葬京口遂卽丹徒家焉服除授中書舍人職務清簡弟子日益進凡經公指授者皆取高第顯名朝廷久之遷督學政力祛宿弊杜請托一以嚴繩之士大夫始有譁者久而服其公且明也丁母憂歸服除改督陝西學政尋進憲副公乃一自振勵劄正學書院選英俊其中躬自教督所識雲南府志

卷之二十

藝文四

八

李夢陽以文學名天下狀元康海呂柟名士馬理張璿輩皆與焉公資警敏能爲文詩與書多慕效李西崖其功力差相伯仲也好談王霸經世大畧材猷足法以是聲譽藉甚用超晉太常少卿尋晉南太常卿遷都察院右副都御史督理秦中馬政西蕃故饒馬必仰給中國茶飲以去其羶酪疾先是高帝著爲令以蜀茶易蕃馬資軍中用久而寢弛茶多闌出爲姦人利而蕃馬不時至公乃請重行太僕苑馬官而嚴私通禁盡籠茶利於官以服



致諸蕃馬馬大集牧政用脩給軍者日益稱足時李文正當國劉公大夏爲大司馬皆善公而材之會邊陲告警陝議遣將劉公言兵難遙度卽遣將以不時往楊中丞在彼可用也勅公巡撫陝西兼理經畧邊務公益選練士卒創築二城以爲固援又劾貪庸總兵武安侯鄒宏及不職諸校尉數人去之適吐蕃數萬騎入寧夏乘勝直趨固原烽火通於內地時總兵曹雄軍隔絕不相聞公慮其失策乃從帳下輕騎僅五十趨之衆爲公危請勿往

公不聽星馳抵雄軍爲之調度復張疑兵以脅吐蕃吐蕃移犯隆德會伏炮夜發響應山谷吐蕃以爲大兵至宵遁塞外邊人士以郭汾陽比之大司馬復議延綏甘肅寧夏等鎮兵散無統請設都御史總制之上報可遂命公總制諸邊開府固圉尋進右都御史公乃具疏極陳戰守之策請脩濬牆塹以固邊防增設衛所以壯邊戍經理寧夏以安內附整戢韋州以遏外侵悉許之公督諸鎮士馬飽騰每按部旌旗戈甲耀原野間吐蕃不敢駐牧



近地公又謂河套卽古朔方地唐張仁愿築三受降城自是無寇警請因險而牆之聯絡相應可制敵而障全陝於數百里外廷議韙之於是大發帑金數十萬使公治築工未竟爲權閹劉瑾陰阻以是移疾乞歸里工亦罷其成者在要害間僅四十里耳邊人至今賴之公旣歸瑾復入讒語坐公冒餉逮下詔獄李文正及王文恪力爭之始得致仕歸公歸京口治私第得唐許刺史丁卯橋舊址圃之以詩奕飲酒自娛顧名聲日益盛適慶藩寘鏞雲南府志

卷之二十

藝文四

十

叛詔起公提督軍務合總兵官涇陽伯神英西討以中貴人張永監其軍公馳至關密諭公故部將仇鉞時亦被劫事叛王者俾乘間捕執之遂悉誅縛其首逆何錦周昂等永亦旋抵壁上見公奇之公見永軍政之嚴相得歡甚初永與逆瑾侍潛邸爭寵不相下時頒賞諸部曲百餘人瑾之姻族毫不見與公固勸之始勉給一二乃顧謂公曰公無慮吾豈爲瑾者哉公曰固也第今權臣內而大將外公誠貴上誠重公保無中變乎永曰然則柰何



公曰公宜亟歸乘上之見嚮聲瑾罪而誅之此千載一時也永悟歸密疏發瑾諸謀反狀蓋公草也瑾用伏誅上因進永柄司禮焉方永之入也畱公節制諸軍陝之軍吏氓士額首頌公勿歸顧朝議之趨召且迫也遂馳赴召拜公戶部尚書論平叛功進太子少保賜白金彩幣尋晉吏部尚書公於時政最稱通練而性廓大不飭邊幅愛樂賢士大夫與其功名朝有所知夕卽登薦以是桃李徧域中嘗再帥關中麾下自偏裨起爲大將封侯佩印雲南府志

卷之二十

藝文四

七

者累累也時大盜起躡中原公調悉機宜䟽前後凡數上復薦用副使吳廷舉等力討平之再進少保兼太子太保廕一子錦衣千戶中貴谷大用陸闇援張永例請封其弟姪伯爵詔報可公力䟽止之不報給事中王昂論選法弊於公有所指摘上爲謫昂公力請寬之給事中竇明及御史孟津等或以言事或與鎮守中貴忤諸繫詔獄者公上書求釋上亦間有所寬也乾清宮災公應詔陳言至指及乘輿出無定期止無常所且置蕃僧戎種於



宮廷諸干成法事因自劾乞罷歸上爲溫旨慰留  
以原官兼武英殿大學士直內閣亡何會災異公  
復自劾因極陳時政得失中有狂言可以獲聖聽  
匹夫得以搖國是禁廷雜介胄之夫京師鮮藩籬  
之託語甚激切上弗省是時張永坐閒廢江彬錢  
寧方倖用聞公疏弗善也於是使所私擾人減質  
輩蜚語上前譏刺公又嗾故諸生朱大周者大誣  
訐公公乃上書乞骸骨疏至再四上始賜勅褒諭  
屢數百言給夫廩逾長格以歸公歸其客日益進  
雲南府志

卷之二十

藝文四

三

凡所摹畫朝事億度無爽時日之爲智囊云宸濠  
之變公度鎮江扼江南諸鎮之吭能備可禦三吳  
失茲要害吳越潰莫支矣於是蠲貲募諸壯士復  
遙促臺使者調金山鎮海諸衛軍環備內外無慮  
數十萬武宗南征聞其備禦有策特幸公第爲晏  
樂者逾兩旦旦暮賡咏篇什古今無儷焉時左右  
有導上幸浙江者公從容諷諫乃不果行顧亦數  
進珍玩上大悅欲特用會晏駕乃已世宗嗣大位  
廷臣爭言公可大用詔遣官賜金帛存問久之陝



西三邊總制缺詔公以少傅兼太子太傅改兵部尚書兼左都御史蒞之溫詔褒譽以古吉甫方召唐之裴郭宋之韓范稱美之故相行邊蓋自公始也公之鎮凡諸軍吏幸公再蒞有恩德又起自台輔將士愈自勸勵旌旗壁壘色彩爲新上以舊勲凡有所條請靡不報屈未一載復詔人爲吏部尚書兼武英殿大學士旣陛見卽進少師兼官如故又以獻皇帝實錄成進太子太師謹身殿大學士時首輔費文憲宏也會張文忠孚敬桂文襄萼以雲南府志

卷之二十

藝文四

三

議大禮得上意驟貴爲宮詹兼學士而諸詞臣皆心鄙之以故詞林諸榮秩如講幄典試教習庶常皆不得與張桂於是深恨費文憲屢疏攻之去公復薦起弘治中故輔謝文正遷屈首輔文正至則公已用陝捷加特進左柱國華蓋殿大學士秩屈文正上矣公猶疏讓文正願屈其次上弗許以是公屈首輔文正亦旋謝病歸公旣以敏練見知一時士大夫皆崇仰之極上益禮重公賜御書和章及金幣牢醴無虛日復賜銀印記二一日耆德忠



正一日繩愆糾謬所言邊務國計事無大小上悉傾聽之顯陵之不果遷則公力諍功居多也是時張桂益貴倖入內閣上之傾嚮且過於公桂文襄以構王文成守仁亦與張文忠相釁隙上以王文成諭公欲知其人公謂其有精忠大節可大用桂文襄密聞而啣之於是張文忠遂疏謂三楊以後姦人占劇揆地往復去來其人日輕勢日重乞下嚴諭俾勿詭隨便已意如往昔蓋指公也公亦奏辯乞歸上兩為溫旨以解之於公尤厚張桂於是

益思構公矣先是公議散館留陸粲等數人爲翰林上難之張文忠密疏言此曹皆費宏所植而一清成之勿留便於是陸粲等爲給事中公弗聞也故粲給事省中時有建白公輒擊節稱嘆謂而家敬輿不過粲內感公國士知禮部侍郎徐縉以次當柄用數謹事公又爲粲座主時時以上意語粲謂厭張桂粲思有所論列未發也會武定侯郭勳帥營務頗貪橫公奏對常盈庫出入計語頗侵之因薦用故中貴人張永同爲提督永遂發動貪汚



跡俄而永暴卒中外頗疑中勲毒言路遂擊勲勲故以大獄事感張文忠每嚴事之於桂不爾桂亦密疏攻勲且謂張實庇之上於是下諸給事御史擊勲章於公且論以孚敬私勲必曲救令勿聽公偶泄之縉縉亦與粲也給事孫應奎疏論張桂亦及公上是其論公上疏辭優詔勉慰至張桂疏各有策勸語公復上辭章謂今之持論多尚紛更臣獨勸以安靜多尚刻削臣矯以寬平欲變法臣謂宜守法欲生事臣謂不如省事用人則謂才難當

雲南府志

卷之三

藝文四

五

惜斷獄則謂罪疑惟輕以故齟齬參差願賜骸骨避賢者路蓋指張桂也粲於是果疏劾張桂罔上行私諸罪狀上乃責張孚敬桂萼負君忘義令孚敬以原職回家劄悔資後用萼革保傳大學士銜以尚書致仕而罪粲不早言逮下詔獄杖謫荒裔屣二日復榜示朝堂明張桂功罪且令中外勿得更加齟齬張文忠陞辭上乃密諭公謂孚敬可還之閣否公言上欲還孚敬固當第渙汗大號甫揚延而遽改之非所以示天下信少遲孚敬至家而



後詔之便張文忠聞益憾公且疑粲疏公所授也  
於是張桂同事詹事霍文敏韜有齒寒之懼上疏  
力攻公因自劾乞歸上諭留公疏辯乞歸上亦溫  
諭留之而意已移矣張文忠至天津上使人以璽  
書詔還復職公遂乞休益切上未許也張文忠回  
見公愈偃然自負且謂公若吾在韜必不敢有是  
言公笑領之霍文敏以省毋給假因復爲桂辯寃  
攻益力上報文敏遂切責公非大臣體公謝以不  
職自陳上乃俞致仕予金帛令馳驛歸旣而霍文  
雲南府志

敏亦私心悔之矣公歸會進大學衍義不與公名  
上覽之不悅謂脩是書實肇於楊一清又嘗序諸  
後可獨遺乎命補列名仍遣官齎賜金帛於其家  
羣議祀禮不一上復念公顧謂左右朕誤放楊一  
清歸若在彼能無決乎諸仇公者聞亦懼公復用  
乃嗾永門下之怨永及公者誣奏公嘗受永金王  
乃薦用永又謂永旣死復以金百兩乞公爲誌銘  
乃詔奪公官命巡按御史追公所受永金如所誣  
數尋亦罷追或請公奏辯公則謂久當日白奚辯



爲顧亦大恨爲孺子所賣鬱鬱以終又四年上念  
之復其官又十五年乃贈太保諡文襄則公所謂  
久而自白也公所著詩文有獻納藁及論罪奏議  
王堂前後集行於世凡所撰述則以石淙繫之蓋  
不忍忘先世故屈也李文正費文憲霍文敏諸公  
皆爲石淙賦以頌美之故世稱公石淙先生云

嚴恭肅公傳

知府李贊

恭肅公諱清字直甫號寅所其先五代祖名阿勝  
字子敬者自浙之嘉興徙居滇父鏌生四子公最

雲南府志

卷之二十

藝文四

七

少而咄咄奇悟鄉先達光祿施昱擇壻得公以女  
歸之嘉靖癸卯舉於鄉明年成進士除富順尹富  
順故劇邑或以調公此未淬之劍而輕斬蛟斷犀  
即公謹謝曰小子何敢抑余劍也乃方在治中惟  
工之所鑄而擇利可乎至則能聲大騰以救荒課  
爲天下最丁毋憂再除郾鄆其治如故操籌入爲  
工部屯田司主事歷員外郎中督脩外城及九陵  
皆斤斤謹出納侵牟吏膠手所省費以巨萬已工  
成當敘陞公辭不受受加俸丁父憂復除兵部車



駕坐忤出知保定府居保定三年課復最歷陞易州兵備副使陝西叅政四川按察使卽其地轉右布政使所至自撫按特舉及兩京臺諫會舉不下數十疏隆慶戊辰擢都察院右僉都御史巡撫貴州尋改四川公故川吏知其民所疾苦乃具籍川課之當輸京者議割二十萬金就近改給陝西軍餉罷罷縣卒之團操成都擾民者貢番入邊則爲定限額數額外不得浮一人他約束一切以惠利爲本而痛持豪家悍吏以法以是士大夫譽誹常

雲南府志

卷之二十

藝文四

六

叅半而內江趙文肅公獨深知之會有以流盜誣公當落職趙公力爭得予告候調候調五年起督鴈門關不果改貴州入爲南大理寺卿尋改北歷刑部吏部左侍郎陞刑部吏部尚書加太子少保上之知公自其在刑部能執法不骫權勢始旣柄用典銓則日夜討故事論官材丞椽以下皆親爲標署楊遵彥之默識黃次公之至精不過也上孳孳以太平屬公且未艾而公病矣上親臨問止見一蒼頭一竹籠籠中止一二敝衣無他物嘆曰嚴



清果清卽古伯夷何加焉勉畱益力公疏數上始  
准歸歸之日遣使慰勞仍使馳傳以萬曆庚寅卒  
於家上聞之不懌特頒祭葬贈太子太保諡恭肅  
公性儉厲勤於事其操行嚴於取舍辭受尤凜凜  
所居官身自與僮僕食麤衣敝蕭然也橐中裝雖  
圖書琴鶴不敢取諸人知保定時有權相奴以所  
賜翠蓋騷擾地方民不安生公捕治以法貯其蓋  
民始帖然權相知公素操不敢加害蜀王慕公使  
使致扇餌微餉不受初拜尚書貧不能具服色束  
雲南府志

卷之二十

藝文四

九

素犀帶以朝其輩或指戲之公釋褐時玳瑁七品  
帶故在耶公笑曰不然夫犀帶不裝金安知非王  
吾顧恐難爲上耳公薰然長者色溫氣和人無賢  
不肖貴賤皆禮接之其亭法處議本人情計久遠  
無崖岸峻物之行謹咋抵掌之談以故聖明眷遇  
尤渥而海內至今稱大人之能安國家鎮雅俗者  
必首公云

劉太僕傳

尚書 傅宗龍

太僕卿劉公文徵字懋學雲南後衛人父體仁嘉



靖中仕蜀新繁令遷保寧別駕所至清約惠愛衙齋種蔬自給蜀人稱劉青菜云以勤瘁卒於官家赤貧子七人皆刻厲向學公其季也幼從諸兄讀書卽能灑然貧困中又從盱江羅公汝芳遊聞聖學蓋廩廩闇脩弱冠舉孝廉絕迹公府萬曆癸未登甲第爲新都令邑當天府孔道達官貴人冠蓋相望里甲疲於奔命公力行條編法悉令歸農時有清丈之役躬歷阡陌九則維均丹書其籍藏諸庫至今經界穀祿無絲髮憾差三殿肇興取材於

雲南府志

卷之十

藝文四

二十

蜀邑當辦大木三公獨任其勞三入蘭州得美材以獻民間若不聞采木之令者賦租手爲較量稍溢錙銖卽還畀民聽訟則令訟者持檄呼被訟者片語解紛終日不扶一人累月不罰一金茅茨千家與長吏相依爲命每以公役至成都兒童連手爭覲其面曰是新都劉侯耶入爲比部主事光廟儲位未定一夕有竝封待嫡之旨與同官六人伏蒲固爭首事者欲沐浴席藁公曰此舉不過各辨臣忱庶幾主上知舉朝有同心耳甚無自標置以



爲名也時稱西曹六君子焉累遷郎中出知廣西  
梧州府以內艱奔歸服闋補浙江紹興約已裕民  
一如所以治新都者篤誠敬持惇大列屬同風罷  
大治時山陰令屏山楊楷會稽令吳中翁愈祥俱  
有惠政罷人祭酒陶望齡爲三賢之詩曰東陽海  
壖國潮濤日吞撞錢塘爲長雄帶以東西江厥宅  
有三山種山居中央左蔽而右龜煙雲所起藏三  
江何縈紆三山何低昂山腰擊大鼓皂蓋朱旛雙  
朱旛者伊誰貌瘦眼有芒其云劉寵孫重佩太守

雲南府志

卷之二十

藝文四

三

章太守坐聽事羣吏爭蹒蹒中有二尹賢二尹翁  
與楊清心等無疵盛德俱有望金石同懸鳴椒蘭  
竝畦芳煦人似三春映物如三光曩者捕妖人僉  
細乘時狂赤舌或燒城訛火將焚岡官能靜其紛  
制使燎弗揚曰雨而獲雨曰暘而獲暘吾民固無  
知乃爾動穹蒼向惟虞斂收茲乃憂無廂明年大  
述職聖人處明堂太師采聲詩聽我三賢章又曰  
古循良之政多得諸資具非關學也於公乃見學  
問忠政事矣夫豈第可以性近通敏可以材呈擔



荷可以氣奮若夫不言之化不怒之威至靜之動至和之守非三者所能辦也遷按察副使分守浙右三府勦民焚香遮送數十里勦之龍山有祠祀漢太守劉祖榮宋太守范希文遂卽其旁創公生祠肖像祀焉初山陰朱閣學家居晰公治勦狀至是當國有汲引意公一日行部嚴州與同官閩中李開藻同登富春釣臺超然遠覽曰諫議不拜謂故人爲天子也今故人爲宰相何不高舉爲引疾乞身徑歸遺公費數百緡在官勦守遺吏越數千

雲南府志

卷之二十一

藝文四

三

里齋送至里舍公笑卻之居六年朝議特拔清恬用爲儀表以原官起公備兵威清公逡巡難進或有勸公不出需後命當得京卿者公幡然曰是有意擇官也乃強起時苗患棘甚道路禦人無虛日公先以計禽通賊土目羅國權繼討花蔑抵拱河頭諸壘盜魁蠟業阿袍皆就縛安定之間賊不敢窺者數年量移四川右叅政備兵松潘當番虜肘腋地故不毛本色仰給川西諸州縣金錢取諸司帑率多愆期士不宿飽東路羊峒生番跨連千里



素不受糜漳臘有土韃數千火落赤之部落也往時鎮守納其橐駝名馬許駐牧內地生齒漸繁窺伺叵測公首重本色又括茶稅糴青稞麥數千碩濟其不給多置軍火器仗轉輸不絕番人偵於墩卒墩卒曰兵使者積糗如山治兵甲如林將出師特未知所向耳會建南兵事竣公受臺使者檄覈所糜金錢之數歸而申儆將吏曰番虜二憾負固久不討今糧械已足又建南所餘儲需甚多不日禡纛其秣厲以俟羊峒生番震恐乞命因熟番以

雲南府志

卷之二十

藝文四

三

請降者六十餘寨土韃聞風徙幕北去一夕而盡凡積贖緩數百緡貯之別駕之廨後代公者爲某君盡攫以去臺使者劾某君乃暴其狀不然世不知公有留贖緩事也遷廉憲總臬全蜀徇寇自隴右流劫川北一路無寧宇會兩臺諸司一時俱乏人公從宜發鎮遠營兵剿之賊匿山中月餘無所見乃露檄撤兵密有指授賊聞兵退果出至半塗伏兵起盡殪之事聞賚白鑑紀錄於是選郎胡汝政擬以京卿召公公聞之曰京朝詎貴近廉臬豈



卑乎君恩到處重如餘生無宦情何乃上書幕府  
遂封印登舟撫軍饒景暉力挽之不可移書令藩  
臬大夫詣衙壺勉留又不可乃以狀聞謂公崇雅  
黜浮素節一生無改廉頑立懦清風百世可師讀  
者以饒公爲知言歸自蜀遯迹卻掃臺使者按部  
式其廬欲一見不可得久之日益貧青黃之交稱  
貸而後舉火熹朝登極大蒐在野起南鴻臚卿三  
疏立辭上嘉其清望加太僕卿致仕丙寅六月卒  
前太宰閔公洪學填滇諡公清脩與直指朱公泰  
雲南府志

卷之二十

藝文四

十四

頑合辭請恤疏云通籍四十年轍迹之歷幾徧而  
橐恒垂里居十餘載蒲纁之徵數臨而臥不起又  
云家徒四壁案擁一經蓋實錄也疏入賜祭墓如  
例禮部仍議贈官與諡

贊曰近世士大夫以廉自命致通顯者多矣然衷  
服牴牾初終乖舛情索雞肋色動豆羹欲以砥障  
流靡豈不難哉余家城南與劉氏比屋而居者屢  
世而太僕公夫人爲先慈姨母以是知公氣真每  
望晨突不煙知公甌中無粟家人甚病而公泊然



若將終身以余耳目所睹記公蓋天下一人而已  
使公入秉衡軸以風勵天下卽毛玠楊瑄何多讓  
焉惜乎強半謝病所用於世者十僅二三然范丹  
爲令以塵甑稱劉寵爲守以一錢聞趙清獻鎮蜀  
以琴鶴名公可謂兼之公不朽矣

李將軍傳

蔣宗道

余門人李子恒春以其父先將軍行狀再拜乞余  
爲傳余言固何足爲將軍重但將軍與余有通家  
好余固稔知將軍義無容辭乃爲立傳將軍諱王

雲南府志

卷之二十

藝文四

二十五

素字昆源昆明人刑曹郎希雍公之曾孫大足尹  
三山公之季子幼習制舉義貌偉而身長有智畧  
善騎射好窺陰陽壬遁之書父師呵之乃止年十  
二應童子試罷縣輒居前茅學使者某公見其屬  
文敏捷遂列富民邑諸生居亡何喪父家窘甚時  
有姊夫張公華山者陞粵瞿州府判欲赴任邀將  
軍同往將軍素慕粵山水人文之名勝慨然從焉  
抵粵粵之嘉興孫公陞偶見將軍題咏大喜因以  
已曾孫女妻之年踰四十始歸滇將軍以久遊黜



學遂不屑復事章句乃改業孫吳應萬曆己酉壬子乙卯武試三舉於鄉旋登丙辰武會試初授滇巡撫閔公洪學贊畫值黔土酋稱叛滇兵援黔將軍同叅將袁善由亦資孔晉安進襲土官營出奇設伏多出將軍謀斬首八十餘級擒賊首段二擢將軍本標中軍守備又屢以才能稱遷喬佃遊擊駐扎安豐營先是易門祿豐安寧三泊諸颯野賊跳梁劫掠無休日將軍至是勦撫兼行而數颯賴以安堵時年已七十復陞山海關副總兵將軍嘆雲南府志

卷之二十

藝文四

三

曰方今國事洶洶馬革裹尸吾志也其如年力昏耄虛糜朝廷爵祿何遂以老致仕年七十三卒於家閔公洪學聞之哭甚哀且厚致賻焉論曰余觀將軍之生平宜其爲詩歌古文一切論說當奔放激烈然余常讀將軍宜竹居看劍樓二集而溫厚和平之氣溢於毫楮嗚呼後漢諸葛君用兵如神而當世始許以名士知此意庶可以論將軍歟

贊

漢



西南傳贊

司馬遷

楚之先豈有天祿哉在周為文王師封楚及周之  
衰地稱五千里秦滅諸侯唯楚苗裔尚有滇王漢  
誅西南彝國多滅矣惟滇復為寵王然南彝之端  
見菑醬番禺大夏杖邛竹西彝後掬剽分二分卒  
為七絕

南彝君長贊

班固

楚粵之先歷世有土及周之衰楚地方五千里而  
勾踐亦以粵霸秦滅諸侯唯楚尚有滇王漢誅西

雲南府志

卷之二十

藝文四

七

南彝獨滇復寵及東粵滅國遷衆繇王居股等猶  
為萬戶侯三方之開皆自好事之臣故西南彝發  
於唐蒙司馬相如兩月起嚴助朱買臣朝鮮由涉  
何遭世富盛動能成功然已勤矣追觀太宗鎮撫  
尉陀豈古所謂招攜以禮懷遠以德者哉

晉

西南蠻傳贊

劉昫

五方異氣所稟不同維南極海曰蠻與戎惡我則  
叛好我則通不可不得使其瞻風



唐

南詔列傳贊

失名

唐之治不能過兩漢而施廣於三代勞民費財禍所由生晉獻公殺嫡賊二公子號為闇君明皇一日殺三庶人昏蔽甚矣嗚呼父子不相信而遠治閣羅鳳之罪士死十萬當時寃之懿宗任相不明藩鎮屢叛南詔內侮屯戍思亂癩勳乘之倡戈橫行雖囚渠殲彝兵連不解唐遂以亡易曰喪牛於易有國者之戒西北之虞而不知患生於無備漢雲南府志

卷之二十

藝文四

三六

亡於董卓而兵兆於冀州唐亡於黃巢而禍基於桂林易之意深矣

西南彝傳贊

司馬貞

西南外徼莊躋首通漢因大夏乃命唐蒙勞浸靡莫異俗殊風夜郎氣大邛笮稱雄及置犍縣萬代推功

明

翰林侍制王禕像贊

方希古

天眷有明勃然龍興豈惟智謀得人乃乘其人伊



何匪將匪相爰有君子海內之望望旣歸之孰能  
違哉彼王彼侯大小畢來惟華川公蔚其文雅位  
雖不崇名動天下人知其名豈知其心我懷德音  
山高海深

忠武侯諸葛亮贊

王 啓

東京失馭炎祚無主四方龍斷帝胄求輔公屈草  
廬日哦梁父三顧旣頻許身翼羽中道愛遺未復  
漢宇五月渡瀘深入蠻土七縱服心豈在黷武南  
方旣定中原可取上表出師伊呂爲伍志雖不就  
雲南府志

卷之二十

藝文四

二十九

名高千古

忠文公王禕贊

王 啓

浙東二儒公居其一遡流求源考亭同出惟公柄  
用草昧之日爝火未收往說經術彼昏不知元運  
已黜如狂肆侮卒乃見啗慷慨捐生毅然不屈皇  
赫斯怒爰整戎卒直擣其巢取致斧鑕乃弔忠魂  
乃詢故實血食有祠信史有筆我再拜公奚遑爰  
述

忠節公吳雲贊

王 啓



忠文遇害公再奉旨彼狂不知繼賊以死公初柄  
用六卿是齒其使滇南匪因瑕累惟帝知公遣降  
遺壘公執不屈死報天子雙魂不歸遙遙萬里惟  
國旌忠先後媿美程嬰杵臼同歸信史

毛給諫王遺像贊

修撰 楊慎

蚤捷甲科職司諫議性戇而剛色溫而厲冠服峩  
峩威儀棣棣抗疏清時直節勁氣奮弗顧身獨立  
不懼仁成一朝名香百禩鐘鼎勒勲汗青書事鳴  
呼先生誠有以繼忠鯁於往喆而激謇諤於當世  
雲南府志

卷之二十

藝文四

三十

穎國公傳友德贊

王世貞

天愛西南乃生穎國惟穎之雄開平是則暗鳴震  
盪兆衆辟易劍閣中彝昆池永辟碧雞再鳴白雉  
重譯豈不崇封帝省其籍

西平侯黔寧王沐英贊

王世貞

於爍黔寧戚均皇胄豪鷲神啓機權中秀玉關師  
出蔥嶺衡仆移兵佐穎樹績留後六詔稱一百蠻  
歸湊華路魍編熊莊何陋世襲開府若若兩綬

張統贊

王世貞



張太宰小憚於霆擊而終安於雉經可謂不遠之復未盡處死之道乃其敷績滇雲飭躬銓部與迪肩衡視瑋骨臭亦洪建之良臣也贊曰張公爲滇樂不可支銘績雞峯衡樞鳳池會是浮沈大侈不施拊心內謀竟以完歸

本朝

楊莊介公遺像贊

范承勳

承勳旣新公祠爰求遺像得諸晉賢寺僧兵燹時負遯以存若神護者雖故紙塵蒙而精神不失儼親炙丰采有深幸焉於是命工摹之絹素裝演送祠仍屬寺僧珍重收藏而贊之曰

謂公而在耶安得起九原而見斯人謂公而不  
在耶何爲乎襟期之澄穆而頤笑之陽春總之  
與草木同腐者其形而與山川競秀者其神天  
能限公以七十二年之壽而不能限者百千秋  
鳶飛魚躍之真世主能俾公蹈絕於窮荒之徼  
外而不能關其口於三代直道之遺民蓋其澹



遠生秋挺森森之勁節空明不夜懸皎皎之冰  
輪非與夫昌黎韓我睂蘇異世同倫者耶宜後  
之聞風興起者披雲霧揭日月而如新





雲南府志卷之第二十

藝文志 五



頌 說 對 引 跋 賦 表 牒 書  
銘 墓表

明

平雲南頌

王景常

聖天子之御大曆服也維清緝熙載敷武功盪攘羣雜混一函宇於是偃武脩文與民休息雲南弗庭遣使招之遇害洪武十四年秋皇帝若曰天厭

雲南府志

卷之三

藝文五

元德土宇瓜分朕奮起淮甸為生民請命鏖戰舂易江漢以清捲旗東指吳會電掃皇天眷命正位宸極爰整六師北定中原河南山東不戰而下元君北眺九鼎南遷秦晉景附屬關洞開兵不頓刃今雲南絕爾之地喘息相保梁王把匝刺瓦爾密戕虐我信使憑陵我郊保若不及時盪一何以答上天之卷慰黎民奚來之望哉乃命潁川侯臣傅友德西平侯臣沐英永昌侯臣藍玉等將鷹揚虎賁之士凡三十餘萬騎萬匹聲罪致討七月禡於



龍江樓船蔽江旌旗亘天水陸兼進星流電邁既至湖廣分爲兩軍大軍道牂牁踏夜郎平會定奇軍由羅佐關擊可渡河奄至曲靖疾若風雨所向輒克土酋蠡屯獸挺莫敢格者未至白石江十餘里大霧四塞元司徒達里麻拒江自固我師輕騎長驅掩其不備先命千騎從上游草山襲其後平旦大兵泗水競渡達里麻麾軍布陣未成列我師徑前奮擊其陣遂亂達里麻走陷於淖生擒之俘斬將士若干人雲南兵大奔乘勝逐之征南分軍

雲南府志

卷之二十

藝文五

二

擊烏撒東川敗蠻四萬僵屍蔽野遂通大渡河奇軍始至西平永昌率大兵趨雲南時梁王聞敗棄城走會寧飲鴆卒雲南平自出師至是凡百餘日得府州若干戶若干馬牛車實無算承制建宮大軍鎮焉明年分兵下大理下金齒下臨安元江凡雲南故境皆羣縣矣又明年遣間使降車里降緬降八百咸以壤賦貢洪惟天兵不浹十辰東抵牂牁南著交趾西踰土蕃北界神州幅幘萬里悉臣悉妾何成功之速哉蓋皇帝文武神聖照爲春陽



肅爲秋霜緩之以仁摩之以義混混乎內之於太  
和元氣中使其民熙熙以翔皞皞以羣得覩中州  
文物之懿太平之樂而不知沐聖澤之深也上自  
漢唐以迄於元羈縻而已乃今維持鞏固與內地  
等信乎王者之無外也又明年班師振旅定功行  
賞諸將以下皆進爵有差於乎古之有盛德大烈  
必形諸歌頌皇風興大雅作草茅微臣不敢多讓  
臣景常稽首頓首而爲頌曰皇明御天統有萬方  
際天蟠地武功煌煌三辰耀靈海宇聿清叶氣嘉  
雲南府志

卷之三

藝文五

三

生蒸爲太平蠢茲蠻方稔藏姦克恇恇穰穰以褻  
天常乾坤之量海嶽是包彼昏而狂誕敢叫呶皇  
赫斯怒爰整元戎吉日載戒車攻馬同於爍王師  
暨暨桓桓天討是將震懾百蠻兵無留行勢若迅  
霆日星晦霧江海沸騰鷹揚曲靖俘彼統酋征靡  
所指再敷天休戰不貪殺殺不卻降斥原疏施以  
迄用康大憇聿迪篚篚立黃拓禹之迹維周職方  
表方建官棋布星分屹屹大城以奠其民封永脩  
蛇以變以化昔也僂偷今爲騶虞載駟載戈戈鉦



不腥南金犀角罔敢弗庭凡此南功將臣僉同維  
一乃心上毘帝聰大烈之龐超漢軼唐風霆流行  
天地翕張會朝清明聖化基之萬國一統坐而釐  
之草茅微臣作此頌焉武功告成天子萬年

說

本朝

小玉泉說

總督 范承勳

泉以至各取其溫且潤也舊泉碧玉稱天下第  
一湯人爭沐之予亦品以域外華清夫誠可浴

雲南府志

卷之三

藝文五

四

可風可詠也抑又何他美乎但其暖氣太盛每  
一坐沐則汗潰而神爲之困見碧玉之左有水  
白石罅逆出渠之得一泓焉溫潤不少減抑且  
抗之不濁掬之味香王褒溫泉銘云白礬上激  
丹砂下沉得此小泉疑更有摩尼珠照其中也  
隨於庚午冬月嵌石爲闌勒以小玉其溫潤在  
我適宜倘亦有潔清自好者過而問耶或不以  
爲贅餘也

對



明

石淙對

崔銑

太宰邃翁楊先生生於滇南徙於湖南家於江南  
江表有屋命曰石淙石淙者滇之勝也客曰地以  
域分域以名定取滇名江古與豫生日有之昔周  
扁濂溪著其鄉也呂書東萊追其先也著其鄉則  
思爲之重是故有弗辱也追其先則思爲之紹是  
故有弗弗肖也弗辱曰仁肖曰孝仁且孝其唯君  
子乎客曰賢不遺位而成名智不遐行而滅德翁

雲南府志

卷之二十

藝文五

五

方居巖廊之上乃耽山水之僻襲居士之迹殆不  
可與生日奚爲而不可也夫無累者弛張易省緣  
者去就決甘澹泊者紛華不移守退讓者勢利不  
亂故大鵬搏扶搖擊南溟者適而已龍可參而食  
之者欲而已昔伊尹成功而罔居周公攝政而思  
明農懼盈之災也唯君子不有成不枯位於是乎  
業著而道尊奚爲而不可也客曰然則翁將隱與  
生日未可也君子之於世無去無就唯道之從介  
士甘遯迹以遂高退士務匿名以辟咎志士求危



身以著節義士樂奮勇以垂聲四行不同失中一也臣之事君其交有淺深焉其任有輕重焉其受恩有厚薄焉不合而去不敢竊祿此初仕者處常之法也大臣則異故交深則必懋其德任重則必安其業恩厚則必永其祚知消息盈虛之機貴豫處治忽安危之繫貴慎是故汲黯寢淮南之謀直也韓琦平內間度也司馬光改法實也夫大臣者國之寄未可遽言隱也客曰元結寄義於七泉張詠表德以乖崖石淙之義將是類與生曰然吾聞

雲南府志

卷之二十

藝文五

六

陰陽之氣凝者爲結流者爲水凝者無變信也流者無滯智也石體乎順故可器水止於內故不可禦孔惡其硜孟非其激在人也亦然唯信能立以通行則不窒唯智能運以正出則不流是故有惻怛之情曰仁存而不妄曰誠行而不跲曰才因勢曲成唯中是經曰權發於人體於誠斯盡信矣周於才達於權斯盡智矣此之謂大備是故可以立已可以事君可以權出處可以正天下備之至也

引



本朝

重遊龍淙得小巫峽小龍湫小引

范承勳

昔人有得於遊山之理者謂遊山如觀書必幾經紬繹而其秘始出予於龍淙亦然初予得龍淙如得奇書一往涉獵屋以洞樓以瀑菴以雨亭以草溪以宛轉而橋以石香呼石以巔以臥遊龍淙數過亦如觀書數過自謂有得矣而不知猶然涉獵也明年秋偕諸子取道別逕尋源

雲南府志

卷之三

藝文五

七

北下小憩洞門指顧之際見合石夾流噴薄中來驚喜曰此宛然巫峽也向何失之頃過對山攢石巖峒間一泓藏碧側身以探復驚喜曰此宛然龍湫也向何又失之向失之而今幸得之且兼得之非山之善變而遊山者之善變也因補勒水上石曰小巫峽勒石上水曰小龍湫客有昂頭而吟者吟曰龍湫無鴈影巫峽有猿聲復有客應聲曰鴈飛不到處何作聽猿情予爲之爽然起曰以爲予因龍淙而得巫峽龍湫諸



子遂因巫峽龍湫而及猿與鴈乎何山水之能  
移情若是乃信遊山之理果如觀書今經數過  
紬繹焉而始得其秘也顯寓於微小備乎大何  
山不可作如是觀又何書不可作如是觀也於  
是酌酒命歌其快幽賞更爲詩以紀之公之同  
好相爲屬和繼梓以壽焉

跋

明

禹碑跋

張含

雲南府志

卷之三

藝文五

八

於乎禹功神矣禹文亦神矣萬世永賴惟禹功四  
海永敷惟禹文萬世賴其功故百靈護其文矣鏤  
夏鼎藏包湖廬阜予乃樁之詞孤山記道理之刻  
皆不可見可見惟此响嘯碑一爾皇帝立元嘉靖  
之十有六載仁洽虞夏文貫姚姒滇蒙小子邇如  
皇畿得觀响嘯刻集咸不能識其全旣歸滇觀蜀  
都太史慎釋文字爲之影句爲之音含驚且喜曰  
何文苑藝林舉昧焉而楊子獨識之乎旣而思曰  
夫禹生於石紐廣袤蜀之文禹開之也楊子生於



蜀其所謂江漢炳靈世載其英將顯茲神禹之迹  
而默啟揚子耶故曰聖人爲天口賢人爲聖譯信  
夫初揚子讀此碑不得者四字夜倏夢黃衣魚首  
人告之曰此南瀆衍亨也篝火而覓之良若契焉  
故曰思之不通鬼神將通之故曰天地有官陰陽  
有藏待時顯也昔司馬遷亦漢太史也南探禹穴  
弗獲覩茲奇何揚子洎子生後史遷幾二千年而  
幸獲見之乎故曰飛龍在天位乎天德見龍在田  
天下文明時之顯也義遠矣哉鏤鼎藏山之文將  
雲南府志

卷之三

藝文五

九

次第顯乎

本朝

譚忠錄跋

知府

羅衍嗣

奉天人

予讀明紀至明世廟時在廷諸君子其骨體激  
烈抗論捐軀矢百折而靡他者抑何磊落而英  
多也顧其間亦有幸有不幸焉幸則爲海忠介  
不幸則爲楊椒山沈青霞忠介力詆奸回批逆  
鱗世廟震怒投疏於地旋復色霽拾而復讀嘆  
曰大臣不言而小臣言之忠哉忠哉而海公遂



大用迄乎椒山青霞兩公竟至斷頸絕脰而死  
是何抗論則一而死生榮辱迥別於霄壤也歟  
然當大禮議起首爲倡議受禍最烈前乎此者  
一十七人之中則有給諫毛公琢菴者夫公之  
志與忠介椒山青霞同或死或不死豈果有幸  
有不幸耶雖然公之事業在青史公之浩氣在  
乾坤卽謂謫忠錄一編與日月同其光昭與風  
雷同其轟烈與山川同其流峙可也後之展卷  
而流連太息者殆將聞風而興起乎若乃忠節

雲南府志

卷之三

藝文五

萃於一門發祥自遠傳載之詳矣不復贅

賦

明

滇南賦

俞緯

滇南草木子嘗慕司馬子長之遊恨其時初事南  
服心參體倦役日騁耳未足以盡其大觀也惋然  
言於西屬石潭先生曰夫人居勝地則其志朗其  
御遠處偏安則其中偃其氣索此牽乎地者也又  
讀帝系舜以諸馮而繼命西伯以岐山而造周爲



之而已曷與地謀此係乎人者也先生以余歎處  
滇者乎請誦所見聞而先生就正焉夫滇之處絕  
鎮也地行西南之域天文井鬼之分肇自巨唐宅  
西於昧谷禹貢導水於南溟莊躋據衆而可王旣  
通五尺於羸秦迄乎漢氏置五屯鑿昆明張騫之  
通西徼諸葛之事南征控八垓於神州闢萬里之  
煙雲廓瀘江而爲門掘西緬以爲塞接交益而竝  
峙抗崑崙之重扼槃乎藪陸之所湊族類不減乎  
中土或炫爛之怪錯奄八區而會五於前則跨帶

雲南府志

卷之二十

藝文五

十一

交趾連延南海危聳撐空懸石雲靄溪汨汨而渚  
流谷掩掩以伏偃途迷迷乎衡宇亘萬里而逾遠  
於後則據躡吐蕃枕騎石門崎嶇跳跌要害之屯  
北指轅以岷巴復遠御乎隴右背長江以爲塹還  
九睽而錯繆於東則右綿施鬼萬壑所充嵩峻岬  
峽肩鼇柱空涵沃野於千里負天限之關垣引長  
渠於二廣卻風門於辰沅於西則遙制八百控有  
猛密老撾肢屬于崖附籍皇圖遠攝乎遐陬曠悍  
馴擾於帝懷恒懇懇以納款又何見乎蒿萊其封



域之內則彝險崇卑雄據千里長林邃谷屏嶺塹  
水蓋將自其大者而觀之其山則龍盤鳳翥虎踞  
虵伸岡巒拱衛翠壁霄青左哀牢右太華陽爪有  
天耳之扼隘銀生連鳥蒙以接霞阜尋所獄之點  
蒼王褒使祀之金碧蜻蛉崇峯脩谷成會要之區  
拓南嶺嶂摩雲爲空扼之邑於是乎竹箭緣壑楊  
柳臨岸旁抽抹猛松栢延幹梭羅婆羅之殊其華  
棠梨榭子之蕢其實紫榆杏櫻椒橙杉漆木蘭椿  
槐櫻李桃栗園桂之馥秋馨霜梅之傳春信乳檀  
雲南府志

卷之二十

藝文五

三

爍爍而騰霞安息靄靄而雲噴卉則紫花白蓮素  
馨杜鵑薔薇芍藥芭蕉紫苑青蘭芬芳於幽谷山  
茶蔥鬱於峯巔蔓脩藤吐種種奇葩有標其葉有  
灼其華或經秋而傲霜或蒸日而拂霞爾乃孔羽  
珮翠鶴頂冠硃雉雉稟素鸚鵡人呼蛤蚧穿其木  
鸛鷓鳴其陰寶樹巢珊瑚之鳥莒山來鸚鵡之吟  
鷹隼鷲搏烏鳥反哺白鷗于飛翡翠啄霧子規夜  
作而促耕燕雀棲暖而春至翅迴鳴號唳止乎其  
內獸則熊羆咆號於深林虎豹長嘯而風烈夕牟



畏露狡兔迎月猩猩夜啼猿猱競捷松鼠之攀緣  
神鹿之隱穴犀象噉牙豪豬刺簪麝狐假威犛牛  
踞山跼躄乎其間珍則有琥珀丹青珠璣瑕英金  
沙銀礦澤媚石柄瑪瑙珊瑚絕蘊寶井錫鐵銅鉛  
石綠碧瑱果則無花猩猩胡桃松實檳榔無柯南  
棗荆棘搖顛香橙纍纍金橘密桶螭頭同族異育  
牟桃橄欖柿榴御霜或託根於崆峒之陰或葦蔭  
於圃園之陽其浸則滇池嘉利蒼水洱澤異龍陽  
宗之湖撫仙星雲之陂瀝滴滌淫會其流涓淤決

雲南府志

卷之二十

藝文五

三

灤成其大洑湫澱灩浮空潏湃噓噏百川洗滌塵  
隘乃若秋月懸波五風轉悞飛沫起濤揚浮溢浪  
大明當天彩雲蕩流溟溟濛濛色連霄漢又若瀾  
滄麗水金沙元江橫襟濛帶山陵懷襄圓淵九迴  
以懸騰溢流雷响而電揚長江挾溲浚湍崔嵬盤  
洞谷轉凌濤山頽渾淪浩淼乍挹乍堆爾乃泄瀉  
湧鹹於浚井採山煮水於鹽池內帑輸賦巨商擅  
賞於是乎蛟龍隱灘鼉鼉處水乃見怪物興雲致  
雨其族則有長鯨吞舟脩鱸吞沫金線竹釘水母



蚌蟪江公大頭康郎細鱗鯖鱠鯉鯢鱸鱉鱉鱉  
蝻蝸螂目蝦噴霓鱗甲鏃錯煥爛錦班沂回順流  
唵喁沉浮其四野則丘垆墳衍原隰陂渠溝洫啜  
畛黍稷離離池塘旣隩高城深池關譏啟柝江梁  
濟水寢廟綿五世之勲巨室端維垣之矩喬木蔭  
蔭朱黻靡靡其居民則高門鼎貴魁豪岸逸流寓  
多齊魯之昆戍遣悉吳越之裔其間雖有毒虺烏  
蠻鳩獠号獠惟構巢於崖阿結茅於山脊友麋鹿  
之與木石竟莫伍於廛市觀郊隩之富奧實京邑

之綱紀帝王之外援開國之弘宇斯蓋宅土之所  
安榮觀聽之所溢矣此其大較也然此特山川之  
粗也乃若天有至粹地有至精協氣昭宣名世挺  
生施全之傳毛詩許叔之授五經張隆之墓擾狐  
兔楊惠之孝感神明文章政事蔚若王昇風裁凜  
然燭若張叔董文彥義以拒賊死睢陽之忠呂季  
平誓不附雍茂子卿之躅傳寶南州人傑仲宣齊  
名經術張英身代時勉之罪郭文秀發相如之曲  
和光道人廉惠先生恥干利祿居恬政明又若襲



字釋蝌蚪之文筮師精卜數之揲麥宗通番蠻之  
書草書綴羲之之帖義若用之節若方珉出將入  
相若一清守死善道若繼魯延壁剛直不阿有澄  
清當世之志希載博雅脩潔達拯溺亨屯之體近  
則山嶽炳靈風氣弘啟英儁迭出未可枚舉當盛  
世而擅名稽海內而爲擬是故游談者之樂譽景  
行者之仰止石潭先生喟然嘆曰壯哉吾子其善  
遊乎余舊有志於是縱言琅琳實獲我心滌我之  
沉疴扁我之靈襟奇奇怪怪眩恍奪神而今惜其  
雲南府志

卷之三十一

藝文五

十五

去子而之湖荆也滇雲子怫然不懌曰石門劍閣  
三巴綿落楚王夢遊之陽臺大禹黑水之流鑿岷  
峨掇之以舒抱江潼藉之以披廓物不終聚復云  
駕言泫然琳琳不知其然

金馬山賦

劉寅

蓐收炳靈房星聚精超鴻蒙而合秀脩凝結而成  
形此金馬之山所以置陬訾而奠昆明也在昔神  
禹受命爰分九區表嶽鎮之崇崇隔方維之頓殊  
有岱有華抗東西以屹若曰衡曰恒界南北而戡



如曠哉梁益併包坤隅功不假於疏鑿地獨鍾乎  
膏腴起層巒之嵯峨控滇南之故墟斯谿訝之岳  
谷駕綿邈之方輿造父固莫施其術勒王良亦難  
範以馳驅觀以蔓草垂駿尖峯批耳白月懸瞳青  
松掉尾瀆赤瀋以湛露流汗溝之邈迤鑄莫待乎  
棠溪產非資於麗水形類騰驤之騏驎勢似振鬣  
之驟駉過日影之須臾磨蒼旻於尺咫迨夫噓氣  
成雲噴沫起風障泥炫熒熒之彩霞鑿纓繞煌煌  
之流虹迅雷張其猛烈疾電助其威雄瀉甘澍以

雲南府志

卷之三

藝文五

十六

注下卷拳毛之濛茸疊巘益翠巔崖增紅洞扇啓  
廐閑之弘厥鶯聲響和鸞之玲瓏萬騎仰觀而辟  
易羣彝睨視而驚冲至於岌嶮巋巍岩巖崑崙萃或  
奔如驚或驟若突峻拔天脊峭削風骨蒼鬱森爽  
隱麟嶸鬱杳橫亘於百里擬長城之矻矻是宜拱  
帝京之尊嚴障大藩以寧謐也或有野老詰予而  
言曰子徒見其小而不窮其大知其名而不究其  
實吾將爲子陳之玄黃肇分氓生蚩蚩若魚若蟲  
無識無知聰明間出命爲君師立一代之典章成



四海之雍熙嗟惟此邦視爲外彝境荒荒而泯泯  
水漫漫而瀰瀰姚姒置之不卽顧問商周鄙之不  
遑保釐俾昏迷而弗悟竟風靡於侏儻楚命莊蹻  
闢地遠來自王於滇顧瞻徘徊君臣之分少定天  
敘之典未諧漢武奮志勞民費財命張騫而遠出  
弭使節而虛回亦有孝宣不務大體慕神怪之恍  
惚行禋祀之瀆理王褒馳驛而西上僅致一奠而  
乃已遺祠廟於崑阿謾冥揆而遠紀唐畏嗟顛之  
跳梁宋限大渡之涯埃元雖小安亦何足齒倚歟

雲南府志

卷之二十

藝文五

七

皇明撫有萬方聖武神文巍巍堂堂旣底寧於華  
夏遂有事於戎荒命矯矯之虎臣揮天戈而奮揚  
直指雲南掃除欃槍截長京之髻鬣剗妖狐之肺  
腸顯允黔寧智勇忠良威已施於戡定恩復盡於  
胥匡化強梗爲禮義變椎卉爲冠裳揖讓之風濟  
濟絃誦之聲琅琅紹述前烈適有惠襄招攜貳以  
誠信鎔頑囂以慈祥國公繼之綱紀益張載平安  
南功業彌昌總制仁賢淑旂綏章來鎮來臨克柔  
克剛致遠人之盡服邁前哲而有光俾金馬迥然



而特立與碧雞相對而相望小姑息之宋元陋怯  
弱之漢唐夫然後知皇明之盛德冠古今而莫並  
紀昭靖之殊勲垂悠久而不忘余聞其言拜跪嗟  
嘆遂爲之歌曰金馬之旁兮有稻有秔金馬之陽  
兮有郭有城臣宣旬其善政兮民勤事乎農耕咸  
矢心而弗渝兮願永享夫千萬之太平

石淙賦

大學 李東陽

邃菴楊先生應寧先世在雲南其地曰石淙及遊  
寓巴陵卜築京口皆以名其所居其入而仕於朝

雲南府志

卷之三十一

藝文五

六

出而官於外語述題識亦以空名繫之文字之間  
示不忘也予嘗泛大湖渡長江山川情狀概於心  
目雖未獲觀所謂石淙者愛其名悉其所懷爲述  
短賦主於體物敘事兼此興之義固不敢擬古作  
者然同心之言同應之聲君子或有取焉其亦先  
生之意也哉其辭曰聳山谷溪峭巖中潺湲兮水  
聲初濺涓以汨瀟忽澎湃兮碎甸或在遠以疑近  
恒自昏而徹明感天機於一觸衆籟爲之不鳴信  
江南之絕境乃物類之至精彼瀑布兮可擬曷蹄



涔之足稱爰有三南居士比象引義取石淙以爲  
名客從湖南而過者曰此非洞庭之波乎碧波千  
頃青山一螺揖靈秀於衡嶽激清風於汨羅昔子  
之旣卹旣弁來遊來歌興懷於其水之丘寄迹於  
此山之阿揆風景於毫芒繁孰少而孰多居士不  
答如茲淙何又有自滇南而來者曰此非昆明之  
漪乎平地仰噴從天下垂建長江而直瀉指瀚海  
以同歸昔子之乃祖乃父生斯聚斯倏星移而物  
改方挹彼而注茲訝江山之不可復識抑疇是而

雲南府志

卷之三

藝文五

十九

疇非居士乃憮然而嘆曰嘻有是哉吾固知石之  
爲石淙之爲淙也吾方手拊鏗鎔耳聞春撞應噫  
氣於大塊引希音於清商挾涼飈以助爽與浩魄  
而爭光達大觀於無外諒至美之難雙蓋將濯纓  
乎萬里之流振袂乎千仞之岡若乃東山在吳以  
象舊邦東坡在黃遂名四方彼二東者之偉績豈  
三南之敢望且夫石者吾知其爲堅淙者吾知其  
爲激匪徒觀物以適懷抑亦將身而比德蓋將礪  
我粗鈍蠲我宿癖滌塵垢於七情漱芳華於六籍



嗟人生之有涯見道體之無息彼羣分兮類聚何物非兮太極殆不知石之爲淙淙之爲石也於是二客乃攜酒與琴遊於淙上荆班雜坐林歌迭唱北南俱失主賓皆忘慨聚散之殊途顧行藏之異尚三人者各適其適渺不知其所鄉也

盤龍山賦

唐堯官

西南奧區滇雲仙界胚暉凝結而爲山偉崇陟之相儷若金馬與碧鷄雖漢祀而疇異靈鷲爲釋迦棲禪之峭雞足爲迦葉示寂之地信足以耀靈於

雲南府志

卷之三

藝文五

三

九垓而稱雄於載記也然豈盡華章其懿也哉晉寧之東有盤龍山焉嗟奇峯之所挺拔實神明之所扶持蔭井鬼以成形託坤維以奠基磅唐顛巖砮磔厓厲喝吻吟嶮駮駮透迤摩赤霄接紫微抱回谷頽深谿五龍盤曲而瀾潛雲湫渟泓而滛滛鬱萬松之虬旋森古栝之奇矯長風中起而怒號疑波濤之在樹杪於是王睢鼓狻寒罽鳴谷鷓鴣催明交鶯變旭猿猱攀條而上下麇鼯奔蹏而突觸風齡雨嘯宵馳晝逐旬迭奏於笙簧迅交適虬



梭柚至若珍怪琇美物其崑天漿神瀆涌其隕石  
髓芬芳曜其陟瑶草金花沓其逵蓋蠅精英而產  
環異真將與廬阜埒秀而齊輝爾其陽景晨開霧  
曠盡息天宇澄空四眺無極森平原之莽畏望蒼  
翠之如紕環紫溪以爲帶比羣峯以成櫛玉案翺  
若崕嶼金沙漱虜丘垤螺岫讓之以爲宗雞馬掩  
之而無色爾乃海勢厯騰鴻波浩汗浴羲輪而流  
暉蕩煙霞而變幻迴疊嶂之雲聯刷錦屏於遠崖  
蜃氣呵嗽而曠睖亦髣髴而乍見至若川嶽獻靈

雲南府志

卷之二十

藝文五

三

龍駒瑞洩儼蹠跡於山麓不知其幾千百歲遠而  
矚之似解珮遊漢川迨而察之似寒蟬初變蛻隱  
而探之似聖鼻輝鄧斤顯而抵之似若華光搖曳  
緬渥水之無奇煙崛詭於荒裔故和氣之所感召  
抑山林之所點綴粵自比丘崇照者攝心了義栖  
真其間世丁元季薙草開林紺公弘構真宇氤連  
設獅象之座樹七寶之旛厥黃金之地拓白玉之  
田陟翠微於上方吼香臺於雲端度藏經於貝葉  
塗林檎於旃檀清梵與禽音而竝響慧光與鼉曦



而其縣施青蓮之法雨幙翡翠之祥煙爾其融火  
初銷蓐收方啟金飈薦涼攜侶結侶指天企於東  
岑度龍橋而抗趾冠以白氈之中著以雲飛之履  
飫以八水之甘拾以三花之蕊捫羅葛以遨步弄  
霏煙而徙倚於是緇流集幽懷鬯妙旨探塵坌蕩  
悟短劫之無多苦情埃之爲嶂汎覺海之汪洋乘  
寶轅而咨訪幻人法於雙忘超一乘而直上庶幾  
虜生滅之具無或可以邀太初而闕無相繫茲山  
之靈秀諒無當於蓮峯溯招提之鬱起聊以闕乎  
起者千百世而下誰足以大倡虜玄風

山茶花賦 有序

唐堯官

滇土繁花品而山茶最奇十月卽放蓋中原所未  
有也然鮮播之詠詩者余觀往籍陳思有芙蓉賦  
鍾會有菊花賦張協有石榴賦虞繁有蜀葵賦宋  
璟有梅花賦古人艷焉余效之作賦一首雖極意  
敷揚殊未盡體物耳

惟玄冥之啓候兮歲將暮而凝寒嚴風慄冽以振



野兮霜霰集而濛霞草木搖落而變衰兮訝蕭瑟  
於林端梅欲綻而須時兮菊東籬之旣殘洵窮律  
之黯澹兮慘游屐而尠歡爰有嘉樹植自滇域天  
集柔巧地媿姝色抽神緘與鬼秘宛葩刊而萼刻  
詭狀異態莫之省測或如粉傅或如珠串或如磬  
圓或如榴燦或如赤玉盤或如絳紗幔或如鶴頂  
之丹或如火齊之幹稜稜兮翠葉是誰兮勻斲縷  
縷兮金粟是誰兮穿絲旣逐瓣兮心分復惹煙兮  
條悞其未開也扶疎磊砢蔥蔥青青疑桂樹之冬

雲南府志

卷之三

藝文五

三

榮迨旣開也鞞鞞陸離煌煌赭赭恍飛霞之爛熳  
邈東皇之未轡兮絕朋援而先芳冒雪霜而吐艷  
兮適蝶凍而蜂僵眇南枝之織素兮占春林而倔  
疆矧陰晴之靡定兮逞麗質而相伴爾其朔風飄  
飄乍起乍伏旖旎婀娜譬彼飛燕則昭陽之妖舞  
也薄暮霏微漠濛沾灑淋漓絳玉譬彼太真則華  
清之洗沐也晴曦斜照揚輝蕩采掩映光華譬彼  
西施則越溪之浣沙也皓雪飛颺揣封營積縞莊  
艷冶譬彼文君則臨邛之新寡也震電倏撼披拂



旛纒秀墮芳躁譬彼綠珠則金谷之墜樓也於是  
羣芳慙沮不知所營香蘭之藝楚畹菴桂之生淮  
南芙蓉之名益都牡丹之盛雒園與夫海棠芍藥  
桃李山礬或體裁么磨或標格瘦清或摧砭冰雪  
或墜落風塵惡朝憇而夕謝兮節歛變於冬春躋  
名葩之冠絕兮豈敢望乎等倫若乃畫閣雲連彤  
軒樾蔭參擬平臺別開三徑倚緋英之玳瑁與交  
疎而相映綠筠翠栢助其精神朱絲玉篴添其丰  
韻於是布几筵集賓客呼妙妓燕良久曳文縠以  
雲南府志

卷之三十一

藝文五

十四

蹕躑兮戴金搖之曄曄揚百里之遺聲兮昭陽阿  
之清越雜蘭差以兼御兮飲瓊飴之仙液咲簪朶  
於雲鬢兮頽玉山而未歇若夫幽崖古剝岵嶸之  
巔疏店孤邨廖廓之地埜况淒涼一株哀植寄穠  
艷於清冷發輝光於顛顛卒使孤賞者握管而沉  
吟趣行者繼馬而留滯緬香亭之寵渥兮與傾國  
而交驩泊蕃禧之表識兮名歷世而同乘胡奇英  
之俶詭兮委炎方而自安良壁產於荆山兮鬲氏  
抱而長歎騏驥困於虞坂兮望伯樂一盼之爲難



慨遭逢之有數兮效達人以自覺豈知希之我貴  
養壽命於晷鬻亂曰姑射仙人霞銷帔棄風儵爾  
溟雲至愛此山川恣游戲化作花神顯靈異賁隅  
之種異奇特比之迥然霄壤別格外丰姿豈易貌  
拙毫誰是茂林客移栽上林不可得留與西南壯  
顏色

表

明

謝賜銀圖章表畧

大學士楊一清

雲南府志

卷之二十

藝文五

二十五

人文宣朗光回虞帝之四聰天命尊嚴重溢康侯  
之三接又云寶篆精工儼千年之蝌蚪奎章燦爛  
絢五色之龍鸞裁成悉出宸衷報塞寧忘天眷昔  
張禹誇榮於几杖徒爲優老之資魏徵侈賜於佩  
刀無間作聖之學相知相遇慨相濟之尤艱同德  
同心感同遊之爲盛又云豫雷地奮脩爲迅發於  
四方妬風天行渙汗幸施於九有悅而繹從而改  
異法尤望兼收言必聽諫必行膏澤曾希下及

牒



唐

回雲南牒

節度使高駢

我大唐聖皇帝德配二儀光齊兩曜仁霑動植聖  
役神龍煦萬國若青天養兆民同赤子東鄰若水  
西屆流沙北通陰山南抵銅柱莫不貢琛而納賚  
航海而梯山請混車書願爲臣妾是知卑微螢曜  
不敢竝於太陽齷齪蹄跨焉能踵於神驥且自九  
彝八狄七戎六蠻雖居要荒盡遵中國縱外彝驕  
倨豈中國等倫且以蠓蚋之飛騰不離溝瀆欲追

雲南府志

卷之二

藝文五

三

鸞鳳之羽翼擬接爍霄雲南頃者求合六詔併爲  
一藩與開道途得接邛蜀賜書習讀降使交歡禮  
待情深招延意厚傳周公之禮樂習孔聖之詩書  
片言旣知大恩合報忽窮兵更犯朗寧重陷交阯  
兩俘邛蜀一劫黔巫城池皆爲灰燼士庶盡爲幽  
冤轉恣胷襟罔知悛革吞越嶲之舊地圍相如之  
故城凌犯不休貪殘轉甚昔交阯都護不閑理兵  
朗寧元戎未解誅寇受以侵欺容其殘暴某比者  
親征海裔克復龍編駕三千之師剿十萬之寇南



定縣全軍陷沒如乾鎮匹馬不回羅和一空嘉寧  
俱盡贊衛段酋遷斬首騎將麻光亮亡軀李善龍  
面縛軍前張銓生擒陣上沉白衣沒命之衆如赤  
日消水殺朱督佞苴之軍若紅爐焰雪諾眉就戮  
思縉自裁董譚龍之恟惶范睢些之窘沮江橋則  
盡底焚燒采笈則從頭覆沒波封瓦解扶耶大墮  
容易誅鋤若高原之縱燎等閑撲滅如順坂之走  
丸收復城池掃殄妖孽仗睿謀之果斷資神術而  
追擒揜韓信滅趙之功吞樂毅定齊之策其於勝  
雲南府志

卷之三

藝文五

七

負詔國同知昨日來鎮西川移徙汝水仗節單車  
大開城門放出人物固無疑阻直擬誅鋤前詔王  
遣張棟成等揚言和奸身纔入境兵已繼來侵欺  
大國熒惑元戎戮僕之儀須依古典已軍令處置  
詔國前後俘獲約十萬人今獨送杜驥妻言是沒  
落杜驥守職本在安南城陷驅行故非沒落星霜  
半代桎梏幾年李氏偷生空令返國杜驥蚤歿不  
得還鄉今則訓練蕃兵指揮漢將鐵衣十萬甲馬  
五千邕交合從黔蜀齊進昔時漢相有七擒七縱



之功今日唐臣蘊百戰百勝之術勲名須立國史  
永書且杜驥官銜李瑤門地不是親近但王室疎  
宗天枝遠派而已李氏竝詔國木夾竝差人押領  
進送朝廷是故牒

書

漢

開西南彝難蜀父老書

司馬相如

漢興七十有八載德茂存乎六世威武紛紜湛恩  
汪濊羣生霑濡洋溢乎方外於是乃命使西征隨

雲南府志

卷之十

藝文五

三

流而攘風之所被罔不披靡因朝冉從驪定笮存  
邛畧斯榆舉苞蒲結軌還轅東鄉將報至於蜀都  
耆老大夫縉紳先生之徒二十有七人儼然造焉  
辭畢進曰蓋聞天子之牧四彝也其義羈縻勿絕  
而已今罷三隄之士通夜郎之塗三年於茲而功  
不竟士卒勞倦萬民不贍今有接之以西彝百姓  
力屈恐不能卒業此亦使者之累也竊爲左右患  
之且夫邛笮西彝之與中國竝也歷年滋多不可  
記已仁者不以德來強者不以力并意者其殆不



可乎今割齊民以附外彝傲所恃以事無用鄙人  
固陋不識所謂使者曰烏謂此乎必若所云則是  
蜀不變服而巴不化俗也僕嘗惡聞若說然斯事  
體大固非觀者之所覲也余之行急其詳不可得  
聞已請爲大夫粗陳其畧蓋世必有非常之人然  
後有非常之事有非常之事然後有非常之功夫  
非常者固常人之所異也故曰非常之原黎民懼  
焉及臻厥成天下晏如也昔者洪水沸出汜濫衍  
溢民人升降移徙崎嶇而不安夏后氏感之乃湮

雲南府志

卷之二十

藝文五

五

洪塞源決流疏河灑沉澹災東歸之於海而天下  
永寧當斯之勤豈惟民哉心煩於慮而身親其勞  
躬胝無旡膚不生毛故休烈顯乎無竅聲稱浹乎  
來茲且夫賢君之踐位也豈特委瑣齷齪拘文牽  
俗脩誦習傳當世取說云爾哉必將崇論竑議創  
業垂統爲萬世規故馳騫乎兼容竝包而勤思乎  
參天貳地且詩不云乎曾天之下莫非王土率土  
之濱莫非王臣是以六合之內八方之外浸淫衍  
溢懷生之物有不浸潤於澤者賢君恥之今封疆



之內冠帶之倫咸獲嘉祉靡有闕遺矣而遠方殊俗之國遼絕異黨之域舟車不通人跡罕至政教未加流風猶微內之則時犯義侵禮於邊境外之則邪行橫作放弒其上君臣易位尊卑失序父老不辜幼孤爲孥係縲號泣內嚮而怨曰蓋聞中國有至仁焉德洋恩會物靡不得其所今獨曷爲遺已舉踵思慕若枯旱之望雨戾夫爲之垂涕况乎上聖又焉能已故北出師以討強寇南馳使以銷勁越四面風德二方之君鱗集仰流願得受號者雲南府志

卷之三

藝文五

三

以億計故乃關洙若微牂牁鏤靈山梁孫原創道德之塗垂仁義之統將博恩廣施遠撫長駕使䟽逃不閉智爽闇昧得耀乎光明以偃甲兵於此而息討伐於彼遐邇一體中外禔福不亦康乎夫拯民於沉溺奉至尊之休德返衰世之陵彝繼周氏之絕業天子之亟務也百姓雖勞又惡可以已乎哉且夫王者固未有不始於憂勤而終於佚樂者也然則受命之符合在於此方將增泰山之封加梁父之事鳴和鸞揚樂頌上咸五下登三觀者未



觀旨聽者未聞音猶鷦鷯已翔乎寥廓之宇而羅者猶視乎藪澤悲夫於是諸大夫茫然喪其所懷來失厥所以進喟然竝稱曰允哉漢德此鄙人之所願聞也百姓雖勞請以身先之敵罔靡徙遷延而辭退

報南詔坦綽書

節度使牛叢

竊以詔國自爲背叛積有歲年乃祖尚於六詔之微非是西彝之長禹會塗山之日不得預萬國之名舜受方岳之時不獲見五年之幸我大唐德宗

雲南府志

卷之二十

藝文五

三

皇帝仁沾動植信及豚魚子育兆明君臨四海憫其傾誠向化率屬來王遂總諸蠻令歸君長仍名詔國永順唐儀賜孔子之詩書頌周公之禮樂數年之後藹有華風變濁穢蠻貊之邦爲馨香禮樂之域豈期後嗣罔效忠誠累肆猖狂頗爲妖孽自四五年來侵凌我疆土圍逼我城隍蓋以始務含容不虞唐突遂令兇醜以害生靈况乃毗橋喪師淝江敗績夫何今日不改前非妄設奸欺詐言朝覲輒舉螳螂之臂大興豺豕之心仍構狂詞且先



代帝王之治也豈嘗外蠻貊以雍之是必天怒鬼  
誅殞身喪國因其褻瀆示彼誠慤况國分大小小  
當事大豈有興動蠻師甲兵侵凌天子藩屏必數  
盡殄滅之秋不然何以不恤其民妄動於衆一旦  
天子赫怒諸侯會兵長驅渡瀘之師深入鐵柱之  
境必不更七擒七縱卽須剪蔓除根當此之時後  
悔無及坦綽今旣離彼巢穴犯我封圻當道已排  
比戰場點鬪戈甲雄師十萬驍騎五千卽遂鼓行  
併令擒戮所差王保誠四十人送書竝已囚繫候  
雲南府志

卷之三

藝文五

三

於軍前用以釁鼓今發遣鄮隴段蠻遷二人特此  
報書

貽韋臯書

雲南王 異牟尋

異牟尋世爲唐臣曩緣張虔陀志在吞侮中使者  
至不爲澄雪舉部惶窘得生異計鮮於仲通比年  
舉兵故日新無由代祖棄背吐蕃欺孤背約神川  
都督論訥舌使浪人利羅式眩惑部姓發兵無時  
今十二年此一忍也天禍蕃廷降釁蕭牆太子第  
兄流竄近臣橫汗皆尙結贊陰計以行屠害平日



功臣無一二在訥舌等皆册封王小國奏請不令  
上達此二忍也又遣納舌逼城於鄙敝邑不堪利  
羅式私取重賞部落皆驚此三忍也又利羅式罵  
使者曰滅子之將非我其誰子所富當爲我存此  
四忍也今吐蕃委利羅式甲士六十侍衛因知懷  
惡不謬此一難忍也吐蕃陽毒野心輒懷搏噬有  
如揄生實汙辱先人辜負部落此二難忍也往退  
渾王爲吐蕃所害孤遺受欺西山女王見奪其位  
拓拔首領竝蒙誅刈僕固志忠身亦喪亡每慮一  
雲南府志

卷之二十

藝文五

三三

朝亦被此禍此三難忍也往朝廷降使招撫情心  
無二詔函信節皆送蕃廷雖知中夏至仁業爲蕃  
臣吞聲無訴此四難忍也曾祖有寵先帝後嗣率  
蒙襲王人知禮樂本唐風化吐蕃詐給百情懷惡  
相戚異牟尋願竭誠日新歸款天子請戍劍南西  
山涇原等州安西鎮守揚兵四臨委回鶻諸國所  
在侵掠吐蕃勢分力散不能爲疆此西南隅不煩  
大兵可以立功云



明

銅漏銘

布政 張 統

雲南古西南彝地勢既偏晷度必差故觀天之器  
 當極精緻則民事早晚所關始免疑滯更譙銅漏  
 先總兵官黔寧昭靖王屢嘗致意而工不稱事嗣  
 侯襲總方面既得良冶遂繼先治克陳茲漏銘曰  
 羲和授時以象觀天天有二曜與天周旋太陽主  
 晝太陰主夜盈縮永短寒暑代謝何以則之置此  
 嘉量水注箭浮時乃無妄勿輕秒末歲功所起差  
 雲南府志

卷之十

藝文五

三

之毫釐謬以千里支干縱橫陰陽消息天人啓合  
 視此為則四民之業各守程矩利爾出徃安爾寢  
 處東作西成不愆不忘庶績咸熙家用平康藩臣  
 施政能知其要九功斯勸茲器之妙

昆明毛氏三節銘

余承勛

眉山文博毛東鎮一日持其家三節卷過余余讀  
 而嘆曰節一也所以成其節之名各有專稱焉如  
 劉毋撫孤及孫保有毛祀謂之慈節可也魏毋孀  
 居誓死以成姑志謂之孝節可也四世至給諫琢



庵公立朝正色抗疏死諫謂之忠節可也嗚呼慈  
孝忠節國之紀也有一於此亦足風世况兼四美  
而萃之一門乎乃銘曰惟坤貞順抱一體元剛德  
資始象此淑媛皎皎雙節風教大原柔嘉維則士  
行攸敦曠代罕匹萃於一門曰劉與魏撫子若孫  
中流砥柱狂瀾載奔昧谷饑景赤曦載掀徽音克  
嗣毛祀以存皇天錫類旨發後昆有曰司諫抗疏  
叩闈犯顏議禮流聲禁垣有曰文博師道孔尊譚  
經振鐸鏘鏘魯璠衍澤未艾降祉益繁匪先曷啓  
雲南府志

卷之十

藝文五

三十五

濬委宗源弘風訓世彤管載言表閭表墓迂寵丘  
園敢告司諫以慰忠魂勒銘三節不崩不騫

咸陽王廟銘

王臣

世之廟食垂萬世而不絕者不於功必於德德難  
知而功易見其宜祀之均也昔羊祜杜預之守襄  
陽也祐以德預以功李冰文翁之治蜀也冰以功  
翁以德見諸事業之大感於人心之深皆卓乎莫  
之尚已然其所優劣軒輊亦自較然矣乎惟存於  
內者真行於外者義難然炳然合二者而有之是



其所以奮百代而超千祀益有不隨死而磨滅者  
矣若有元行中書省平章事賽公咸陽王其殆庶  
幾乎王本諱贍思丁爲烏孫國師之後其國言賽  
典赤猶華言貴族也至元甲戌王奉詔鎮諸彝藩  
遂來滇南舉賢用能分職理務下車之初以興學  
育才爲先建文學歲祀於二丁收置載籍以示學  
者抵大理詢父老諸生利國便民之要博採而力  
行之政聲大著南荒之人翕然向化由是省徭役  
收散亡恤鰥寡備水旱優禮賢士汰去冗員置屯

雲南府志

卷之十

藝文五

三

田以便攻守薄稅賦以廣行旅饑寒者衣食之流  
散者撫字之凡興利除害之事靡所不究又建省  
堂治驛館脩橋梁興市井百爲之備而民不知其  
勞十二年冬會蘿槃甸叛王徃征之諸將請攻王  
不許降卒有乘城進攻者王命縛之蘿槃王聞之  
遂舉國降諸蠻長各獻金幣奔走若不暇王遣郎  
中楊璉諭迤西和泥諸部皆望風而靡比卒安南  
王遣使齊經爲文致祭百姓號泣震野已乃請諸  
朝贈守仁佐運安遠濟美功臣太師開府儀同三



司上柱國咸陽王諡忠惠明有天下雲南入職方  
王仍廟食焉因記而銘之銘曰王昔奉命治西秦  
陶民以義噓以仁甘棠餘愛千家春遺黎口碑同  
琰珉帝遣南滇化邊氓詩書禮樂澆漓醇邇人戴  
之父母親南方信之著龜神挺平廟謨必臣鄰森  
乎功烈羅星辰犬羊踏伏敢信信春陽發育皆收  
收酋王膽落拜望塵願爲赤子貢國珍表德旌勛  
優詔頻公搢躬圭儼冠紳鐘喧鼓考邊豆陳諸侯  
佩玉來精禋王執玉鞭騎蒼麟龍旂獸盾千百人  
雲南府志

卷之三

藝文五

三七

早施澍澤無邊垠疾應禱事無呻吟王之博惠侔  
化鈞王之英爽如星辰我歌樂章薦溪蘋願王世  
世庇滇人

恭肅嚴公墓誌銘

大學士 王錫爵

今上萬曆中大臣之以清德著望受天子特達知  
所拔擢待遇皆異等而未竟其用以死者海內蓋  
有三公諸城丘簡肅公檉瓊州海忠界公瑞與今  
昆明嚴恭肅公清先是嚴公謝太宰事歸上數問  
閣臣嚴尙書病愈否會本兵缺則特音詔補公如



楊襄毅故事又特使使者馳傳趣公行又數問閣臣嚴尙書何時來已公疏至具言臣實病且廢不勝首丘私念以負上惟上哀察上不得已停筆欲署其奏久之方許比越歲上優禮歸老重臣又首晉公太子少保給廩米輿夫無何訃聞上若曰是惟予萬里親臣贈卹故事外宜有特加於是閣臣議端僖恭肅二諡以請上又特旨黜用今諡其終始注眷殷繁款篤尤兩公所未及云公字直甫號寅所其先五代祖名子敬者自浙之嘉興徙居滇雲南府志

卷之三十一

藝文五

三十一

祖暉父春塢公鏃以公貴得累贈至資政大夫刑部尙書祖母董氏母佘氏俱夫人佘夫人生四子公最少而咄咄奇悟鄉先達光祿施公昱擇婿得公以女歸之嘉靖癸卯舉於鄉明年成進士除富順尹富順故劇邑或以調公此未淬之劍而輕斬蛟斷犀耶公謹謝曰小子何敢抑余劍也乃方在治中惟工之所鑄而擇利可乎至則能聲大騰以救荒課爲天下最丁母憂後除邯鄲其治如故操尋召入爲工部屯田司主事歷員外郎郎中督脩



外城及九陵皆斤斤謹出納侵牟吏膠手所省費以巨萬已工成當叙陞公辭不受受加俸丁父憂復除兵部車駕車駕主行郵政以清強敢任怨聞坐忤出知保定府會歲旱多盜公政先保民歲既漸熟乃具爲條教劑俗飭蠹犁然有理故事三輔郡歲籍民克京師庫役公議罷之至今稱便居保定三年課復最歷陞易州兵備副使陝西叅政四川按察使卽其地轉右布政使所至自撫按特舉及兩京臺諫會舉不下數十疏隆慶戊辰擢都察雲南府志

卷之三

藝文五

三九

院右僉都御史巡撫貴州尋改四川公故川吏知其民所疾苦乃具籍川課之當輸京者議割二十萬金就近改給陝西軍餉罷郡縣卒之團操成都擾民者貢番入邊則爲定限額數額外不得浮一人他約束一切以惠利爲本而痛持豪家悍吏以法以是士大夫譽誹常叅半而內江趙文肅公獨深知之會有以流盜誑公當落職趙公力爭得予告候調及後五年起督鴈門關不果改貴州入爲南大理寺卿尋改北歷刑部吏部右侍郎復自吏



部陞刑部尙書上知之公自其在刑部能執法不  
骫權勢始旣柄用典銓則日夜討故事論官材丞  
掾以下皆親爲標署楊遵彥之默識黃次公之至  
精不能絕也中外吏師其廉儉苴牘之間幾無一  
跡上孳孳以太平屬公且未艾而公病歸矣歸之  
日遣使慰勞仍賜馳傳以萬曆庚寅年六月二十  
八日薨於家距其生嘉靖甲申年四月十八日得  
壽六十有七公性檢厲勤於事其操行嚴於趨舍  
辭受尤凜凜所居官身自與童僕食麤衣敝蕭然  
也橐中裝雖圖書琴鶴不取諸人蜀王慕公使使  
致扇餌微餉而不受初拜尙書貧不能具服色束  
素犀帶以朝其輩類或指戲之公釋褐時玳瑁七  
品帶故在耶公笑曰不然夫犀帶不裝金安知非  
玉吾顧恐難爲上耳蓋公之內行脩潔與海在二  
公畧同而二公喜谿刻標異稍闇於大體乃公獨  
薰然長者色溫氣和人無賢不肖貴賤皆禮接之  
其亭法處議本人情計久遠無崖岸峻物之行謹  
昨抵掌之談以故明主眷遇尤渥而海內至今稱



大人之能安國家鎮雅俗者必首公云銘曰公起滇南萬里遇主不介而親其惟德舉試吏一同爲郎再考環轍方維頌者交道中丞之節于蜀于黔斤斤其明濯濯其廉入典法臺不骫三尺以晉冢卿式是百辟胡威之清惟畏人知蘓章疆切以忠見思古社稷臣待公屈指千載遭遇未究遐祉鬱乎高山司空取榮埋石其墟載以嘉名曰惟帝賚曰允師錫尙俾來許仰止無斃

墓表

雲南府志

卷之三

藝文五

四

本朝

廬江學博李公墓表

知州

陳

虹丹徒人

昆陽鄉賢李公諱兆旂字士聘號三辰明思宗時仕廬江訓導獻賊猖獗城破死之少子淳隨之官亦死之事聞詔入祠余奉

命刺昆甫下車其中子演澄向余請曰吾父死於賊吾弟又死之願爲文以誌不朽且死萬一能有知將不悼其不幸於地下矣問其死事之始未演曰吾父以庚午歲薦司訓廬江乙亥年盜



賊蠡起當是時廬以孤城獨守北門之管惟公是寄賊度不可犯選誅潛入偵虛實捕得同列相顧不敢發公拔劍手斬之曰吾立志掃除狂賊誓與此地共存亡此何等時而猶悞悞耶未幾城陷賊入自東偏被執不屈死弟淳伏父屍而哭哭畢罵賊亦死此演四十年來痛心切齒徃徃盡然不知其滂之流落也問公之素履澄曰公爲兒時端謹不苟言笑事父母孝友愛鄉閭族屬其訓廬江也言行而身化之爲南京國

子祭酒王昆華先生所器問其家世及身後之事澄曰先王父桂前甲午貢士歷官龍泉令藥弗仕義方嚴且切故廬江公得有成立公死廬江時演澄輩遠在天南不知遺骸藁葬之何處也先孺人洪幸以計免招魂而歸卜葬於城西寇蓋之原澄兄弟八人獨演澄在耳淳又死於廬無嗣孫男子八人雖一經世守然必求海內之有道德而能文章者爲先人表而出之余聞而悲之古者禮樂政刑之事與夫忠孝廉節之



材皆出於學故師儒之選必慎重其人公仕於學而死於學職也季子淳從公而死於公分也獨惟天下之死於其職與分者幾人哉明之高祖列宗三百年養士於茲矣其高爵重祿所以待士大夫者厚而當事者因循苟且貽誤國家甚者貪冒無厭極其奉於歌舞田園而不恤一旦賊至倉皇無措委宗社於荆榛棄生民於塗炭而仗節守義顧得之苜蓿不飽之官且父子相繼以死嗚呼是可嘆也滇陽人文允著風氣

日新公以荒徼萬里之身慷慨就義視死如歸豈公之天性然耶抑人心風俗涵育薰陶而致此耶聞先生之風當必有頑廉而懦立者矣  
詳文

開民困苦已極等事

按察 佟世雍

康熙三十四年四月初二日據開化呈詳蒙本司牌准布政司手本內開康熙三十四年二月初五日奉

總督雲貴部院加四級王批據開化府紳衿里



民龍天寵等呈前事等因呈詳到司據此除移  
覆藩司外該本司查得開化府所詳該府屬寶  
田七百五十九頃三十五畝六分二厘五毫每  
畝一斗六升起科正耗共米一萬二千八百石  
四斗五升三合一勺一抄九撮一圭二粒五顆  
若減去四千石每畝正耗尚科糧一斗一升五  
合八勺九抄三撮六圭二顆二粟較之各屬獨  
重亟請懇賜

題減誠宜照如該府所議轉請甦豁者也然此特

雲南府志

卷之二十

藝文五

四

就開化一郡而言若通省重困則有屯糧照租  
之加徵爲尤甚查屯糧係故明時將衛軍定爲  
十分內以三分爲操軍七分爲屯軍各給田地  
獨歸屯軍顧種每地一畝出租一斗五六升至  
三斗八升不等每田一畝出租四斗五六升以  
至伍斗六升不等以養操軍其衛所千百戶等  
弁各按品級撥給田地招佃收租亦如軍田之  
數俱不納糧此屯租之所由來而非屯糧也及  
裁革軍弁正值吳逆尙恣橫虐竟將軍弁所收



租額改爲田地正供錢糧以博開疆增賦之虛  
名當時有司莫敢與爭遂貽此累民賠糧之實  
害今衛所軍弁已裁軍戶田地錢糧割歸州縣  
徵收上納滇省麗邑民田應納額糧每畝自二  
三升起科至七八升而止尚有赤貧輸納不前  
之民屯糧則每畝照佃租三四五斗起科不等  
計通省民賦田地共六萬二千八百四十二頃  
零止實徵銀九萬四百一十二兩零正耗米一  
十一萬五千五百一十五石零麥三萬二千八

百六十九石零屯田實在田地止七千五百二  
十二頃零乃實徵銀四萬五千九百三十二兩  
零實徵正耗米一十二萬五千二百二十七石  
零又徵正耗麥豆穀蕎六千六百八十六石零  
是屯糧正賦幾六七倍於民糧矣輕重較若列  
眉苦累不待言辯此則通省屯糧之亟宜詳請  
題達改照民賦一例科徵以甦滇民之重累者也  
本司極知田地税糧事在藩司糧道爲政奚容  
越俎然查此項屯糧曾經藩司於遵



旨編輯全書等事案內在康熙二十八年間開列八  
款內首為切詳兩臺轉達

大部在案後因全書停其更改遂爾中止則是  
屯糧重徵之賠若非藩司不為切陳兩臺不為  
咨達

大部不為

題覆

皇恩未為俞允也值茲

聖主仁周德洽澤遍恩敷發帑金以救秦災歎歲即

雲南府志

卷之三

藝文五

四

成大獲截漕艘以裕兵食海運亦俱效靈耨耕  
預飭杜隔歲之煌災濬築先籌免歷年之河患  
固皆

帝德廣運先天弗違而歷免省積逋

盡蠲上年正賦

特簡督部院崇階總制

殊擢撫都院晉位建牙何莫非

皇上軫念滇徼孑遺必欲全登衽席從古未有之

浚恩曠典若不於此時將茲屯糧苦累亟為愷



切詳明耑疏

題減從此日久弊沿終無甦息之望矣謹因開化  
府一罷之詳請半減額糧亟請轉懇減全滇之  
屯糧倍蓰民賦相應詳報請批藩司會同糧道  
查議詳請亟為耑疏

題減倘蒙

聖主洞鑒滇省民田軍田同此疆域同此則壤而屯  
田糧米何以六七倍於民田銀米之實苦

特恩俞減與民田一例科徵則成曠右趨今之鄧隆

雲南府志

卷之三

藝文五

七

至治於千百萬襁之無疆矣等因呈詳奉批所  
詳諄切仰候藩司會詳到日酌奪仍候撫都院  
批示繳奉此本月十九日又奉

巡撫雲南都察院加四級石批據本司詳同前  
由奉批仰候布政司詳到會核仍候督部院批  
示繳

